

四庫全書

集部

欽定四庫全書

集部

屏山集卷

十七至
二十

詳校官右中允臣薩敏

主事臣呂雲棟覆勘

覆校官博士臣劉光第

校對官編修臣沈清藻

騰錄監生臣蕭準

騰錄監生臣姜士安

欽定四庫全書

屏山集卷十七

宋 劉子翬 撰

詩

次韻蔡學士巖桂

才應擣藻大明宮
戲詠巖花屬意工
酷愛清香凌鼻觀
更欣佳句愈頭風
移來已覺池臺勝
賞處何當杖屨同
不解小山招隱意
巖幽歸夢遶青叢

得冲佑命

幾年歸夢水雲間
猿鶴重尋已厚顏
慚愧君恩猶竊祿
官銜新帶武夷山

與溫其對榻

細雨南窓夜青燈對榻眠
升沈嗟薄宦聚散忽流年
失路誰推轂他時看着鞭
竹林須款集君亦暫流連

和士持栽果十首

桃

手種桃花滿北山
花紅艷艷照春灣
不知何代兒孫老

却見漁舟乍往還

李

仙枝移傍小巖幽
答選名推第一流
曾向清波湛寒碧
甘瓜五色但輕浮

梅

園林漸見綠陰濃
漠漠輕煙細雨中
底事望梅能止渴
好將清影映高峯

橘

南北由來地氣偏
凌寒松栢但蒼然
踰淮種橘今為枳
豈比中人性易遷

櫻桃

一樹含桃火燦空
而今春獻隔離宮
只應壯士憂時淚
洒向枝頭點點紅

石榴

庭榴結實墊芳叢
一夜飛霜染茜容
萬子同胞無異質
金房玉隔謾重重

橙

橙橘甘酸各效能南苞錫貢不同升果中亦抱遺才嘆
有客攀條氣撫膺

枇杷

萬斛金丸綴樹稠遺根漢苑識風流也知不作清時瑞
朽腐那關故主憂

來禽

粲粲來禽味獨奢孤根誰徙向天涯好尋青李相遮映

風味應同逸少家

栲栳

秋林黃葉晚霜嚴
熟帶甘香味獨兼
火傘頰虬浪襄拂
風標那似邑中黔

與原仲至交溪橋

倦憩春橋午回環
翠碧重亂溪流背
海新柳色欺松厭
市常思野為官不及農
喜逢湖上客談話得從容

山源

汨汨山源水分流去若馳有聲知尚淺得勢轉但卑葦
棘連荒浦魚蝦聚小泚起予湖海興惆悵念前期

春望

杳杳盡寒色乘高望更迷曉晴山氣上春漲野橋低幽
鳥啼無伴閒花發欲齊幾多沈寂景醉筆為提撕

書齋十詠

筆架

刻畫峰巒勢尸功翰墨餘鎖窓閒畫永高卧數中書

剪刀

錯落雙刀合晶熒百鍊光剪裁皆在手終不露鋒鉞

喚鐵

號令行惟信人誰不我承舉烽諸國叛敲鐵小童謦

紙拂

拂兒雖草創日用最相親莫遣維摩室潛生庾亮塵

圖書

慚非蘇子佩聊置簡書間尺牘予慵理何勞汝汗顏

壓紙獅子

鎮浮須假重刻石作狡狴偶以形模好兒童競見知

界方

抄書防縱逸界墨作遮闌妙用誰能識心端筆自端

硯瓶

小瓶防硯渴埏埴自良工懷抱清誰見聊憑一滴通

燈檠

伐木收奇幹安燈創小檠勿誇能自照得助益高明

檮案木

匠餘留片木檮案定歌傾不是乖繩墨人間地少平

有酒

誰家好事許相過有酒何妨醉面酩兄弟偶同詞館逸
林泉偏傍故園多晨鐘屢趁伊蒲飯晚艇時聽欸乃歌
莫遣是非來到耳只應愁睡奈閒何

過東陽

小箔鳴機幾萬家時清猶想舊繁華樓臺夜映雙溪月

簫鼓春迷後坂花回首十年真夢寐停驂四顧但風沙
却過蕭寺無人語獨對枯林數暝鴉

題蓋竹廟

雙猿嘯月寒巖幽陳侯故家官渡頭陰陰老木旗旌暗
渺渺驚灘雲霧流九旅已荷本朝渥三鴈更忻同日侯
我來瞻拜想遺直嘆息此道今悠悠

遊北巖

濺濺小水暗通池熠熠高花亂出籬知有精廬潛寂寞

更忻蠟屐共襟期
茗芽未辨三湯試
麥餅先嘗十字炊
幾許幽竒待知己
品題政在一篇詩

訪原仲

布衣自昔有遺才
白首窮經隱澗隈
門掩青山朝暮色
客來濁酒兩三杯
鴻冥豈復驚塵網
鸚薦虛聞達帝臺
我亦放情依一壑
雲間杖屨喜相陪

北風

鴈起平沙晚角哀
北風回首恨難裁
淮山已隔胡塵斷

汴水猶穿故苑來，紫色蠅聲真倔強。
翠華龍袞暫徘徊，廟堂此日無遺策。
可是憂時獨草萊。

同原仲茂元致和入開善

寒聲蕭蕭霜葉秋，石路磽确穿林幽。
雲橫遠岫若平斷，風約小溪如倒流。
偶經名藍亦終日，喜有勝士同茲遊。
移床果茗咄嗟辨，曳杖欲歸仍更留。

原仲溫其彥藻彥符致明集啟廬

清樽勸客且留連，亂後相從亦偶然。
三徑生涯鄉社裏，

一秋心事菊花前向來憂喜皆陳迹老去光陰逐斷弦
懷抱故人今有幾只因情話可忘年

過天竺寺

一徑聯鑱去身疑在畫圖林陰穿欲盡山靄近還無下
榻聊盤礴裁詩屢囁嚅道人留客意片月出雲孤

山館偶題

水遠山堂竹映橋偶來塵意已潛消最憐曉日浮波影
滿壁煌煌玉電搖

悠然堂和致明絕句

清霜一夜倒蒹葭
放出湖光徹遠沙
漠漠浮煙收欲盡
晚風輕浪蹴銀花

雜題四首

積雨生秋意
浮陰放晚晴
鐘聲寒野迥
橋影小溪清
殘霞銷暝色
新月長圓輝
黃落樹滋本
夜眠人息機
蒼溜停清瀉
林聲息怒號
水浮秋色遠
山帶夕陽高
宿鴈猶驚渚
昏鷗已著林
野平雲散亂
江動月浮沈

道中

微風收宿靄細路遠平皋石亂春溪急山寒曉月高鳥
聲時出樹花氣欲侵袍行役兼清賞驅馳未覺勞

次彭資深韻

林下相從多勝友誰如吾子妙才華曳裾所至成師席
射策由來有世家意氣胸中千里駿文詞筆下九光霞
郵亭一見傾懷抱投分金蘭不足誇

奉酬少稷道舊之什

少日胸懷輒自竒與君談笑叩天扉
南宮試藝聯裾出上苑尋芳結騎歸
亂後交遊今孰在向來心事已多違
雙魚忽得平安信回首家鄉夢欲飛

宿雲際偶題

穀雨都無十日閒落紅棲草已斑斑
曉煙未散屋頭樹春漲欲浮天際山
翠蓋縈風沉遠坂漁舟驚浪落前灣
鐘聲認得林邊寺歲歲藍輿獨往還

贈詹朝倚

之子詞鋒孰敢爭
他時雲路定飛騰
客懷未免悲彈鋏
文社遙知喜得朋
舊隱生涯三徑菊
夜窓絃誦十年燈
長篇寄我情何厚
欲和陽春愧未曾

雪

曉天冥漠霰初飛
皓皓山顏復水渚
莫遣瑤林生染汙
却憂雲路隱巖危
寒侵夜褐樽前覺
春入晴簷枕上知
憶得梁園探花早
十年淚眼看旌旗

隆祐太后挽歌辭三首

三朝欽母訓四海被仁風
倉卒垂簾政艱難取日功
仙遊睽懿範孝慕恻皇衷
寢隧休華飾靈輻必返嵩

謚易徽名正恩加戚屬優
素心潛道妙盛化秉坤柔
握璽終存漢為梁實配周
願書班馬紀萬古播芳猷

儉約身為率憂勤壽豈延
鐘殘長樂夜目斷永陵烟
歸馭應奔月餘勲賴補天
傷心南渡日一棹溪江船

徐大著挽詩二首

韋經傳素業漢策射魏科
史擅三長譽書讎九寫訛
甌

塵終寂寞雲路久蹉跎迅景崦嵫迫知君恨獨多

方同傾蓋樂遽起絕絃悲道向清朝屈心惟靜者知阻
修綿酒莫誰續錦囊詩宣室空思賈淒涼又一時

次韻劉憲詩二首

吾宗三鳳久心降一見端如渴飲江好客襟懷真絕倒
封侯骨相自耆龐知名夙昔慚驚座袖手雍容笑斲窓
豈謂詩盟容我輩啞鐘無韻若為撞

已築高城受虜降盟言端的有如江翠華回蹕清馳道

繡指觀風絕犬龐凱奏花鄉初卷甲詩成草聖屢題窓
還朝有策裨聰聰納諫那憂以杖撞

次韻溫其雪

侵凌臘尾近春前凍色冥冥不見天一洗氛埃終自潔
暗催花柳為誰妍單衣窶巷無朝爨垂箔高門有醉眠
聞道江頭消息好玉旌瑤幟滿樓船

次韻原仲幽居

貴賤營營各有謀柴門晝掩靜幽幽讀書無效空千卷

學稼雖勤少一邱感慨舊餘王粲賦棲遲今倦長卿遊
幔亭莫失春風約我亦身如不繫舟

次韻原仲竹

夕煙浮野圃春竹過鄰塘石澗深深影風軒遠遠涼禪
心敲有韻翠袖倚生香不有冰霜勁蒿萊到汝長

書事

三年玉帛走稽山萬騎凌江稍北還絕塞風煙連魏闕
千官戎服立朝班皇圖鳳歷謳歌裏紫色繩聲倔強間

露布更傳原上捷王師早晚下潼關

客路

客路經春雨淹留未得歸徑泥黃染屨林霧白侵衣直
氣何由吐愁心只欲飛東風如解事吹夢落漁磯

哭呂居仁

瞑目荒山裏攜家萬里來旅塋猶借地兒哭不勝哀裂
旣妖難測藏舟事可猜大賢應有後天道信悠哉

贈詹道人

道人山北住鄉曲舊知名語妙初疑簡神藏久益清夜
衾寒楮白歸鳥兩鳧輕心靜皆仙境何勞歎玉京

燕子

燕子何光彩飛飛引衆雛營巢終老草解語只含胡賀
履恩非淺焚宮禍亦殊寥寥鴻鵠志嗟汝豈能俱

秋意

又見庭梧一葉飛物華心事兩差池百年未半老相通
四序平分秋獨悲過岸山川雲漠漠殘燈院落雨絲絲

客懷料理須杯酒
哭向窮途定自癡

屏跡

屏跡山樊避世喧
晚風落日靜柴門
寒泉遶竹通幽圃
小徑穿田入別村
散策微吟霜葉脫
鈎簾宴坐碧雲翻
閒中興味知何晚
絕口名途不更言

哭士特二首

自古才難得
斯人又早亡
青蠅頻去國
白首嘆為郎
不覩遺書奏
徒懷挂劍傷
楚魂招不得
南斗夜無光

世緒風流遠鄉評譽望清苦心幾傳癖老筆擅詩名已
訝祥占鵬終憐夢泣瓊五峯雲外碧一慟見交情

讀士特詩集

誰將家集到書帷故喜風騷擅一時快讀祇愁唯覽誤
流傳不但落楓竒唱酬濫許聯東野叙引仍欣得救之
生死窮途天不恤虛名安用日星垂

燕子

燕子營巢得所依銜泥辛苦傍人飛秋風一夜驚桐葉

不戀雕梁萬里歸

下灘

亂石槎牙瀉怒濤
滿船性命等鴻毛
莫誇好手翻成誤
寄語舟人穩着篙

絕句五首

目送孤鴻獨倚樓
晚風吹淚更橫流
蕉花落處蠻烟碧
六十三程是白州

雙魚來自瘴江濱
一讀家書一愴神
見說炎荒風土惡

可無神物護忠臣

干戈擾擾恨何窮
南北東西任轉蓬
世事不堪長齟齬
胸中賴有氣如虹

喜聞歸騎已揚鑣
載酒相迎不憚遙
我是武夷東道主
便同蠟屐上岵峯

竹遶茅簷水遶堦
東風漸欲放春回
丁寧紅紫休爭發
待取山南刺史來

寄蜀二首

盜隔枝江遠人來蜀道稀
亂離非復昔富貴不如歸
戎馬心何壯家山願莫違
阿圓從小慧解嘆白雲飛

有客傳歸信愁懷得暫寬
兒童占鵲喜鄰里借書看
離蜀秋方半浮湘歲欲闌
柴門頻洒掃夢想見征鞍

野墅

野墅驚秋晚殘年忽忽過
海潮通井淺林日到窓多
酒盡鄰翁餉詩成稚子哦
人生行樂耳軒冕奈余何

秋宵

秋宵如許永兀坐思悠哉手誤挑燈滅情長鼓瑟哀清
號生竅穴皓色轉崔嵬醉覺雄心在流光且莫催

春圃六言絕二首

侯騎不侵南海好山多近吾廬醒歌醉眠任我朝奏暮
召從渠

南堂面山已勝北檻俯澗仍幽千巖莫非石友萬壑總
是清流

屏山集卷十七

欽定四庫全書

屏山集卷十八

宋 劉子翬 撰

詩

汴京紀事

玉璽相傳舜紹堯
壺春堂上獨逍遙
唐虞盛事今寥落
盡卷清風入聖朝

朝廷植黨互相延
政事紛更屬紀年
曾讀上皇哀痛詔
責躬猶是禹湯賢

聯翩漕舸入神州
梁主經營授宋休
一自胡兒來飲馬
春波惟見斷冰流

內苑珍林蔚絳霄
圍城不復禁芻蕘
舳艫歲歲啣清汴
纔足都人幾炬燒

空嗟覆鼎誤前朝
骨朽人間罵未銷
夜月池臺王傅宅
春風楊柳太師橋

御路丹花映綠槐
瞳瞳日照五門開
五王欲與民同樂
不惜千金築露臺

神霄宮殿五雲間
羽服黃冠綴曉班
詔許羣臣親受錄
步虛聲裏認龍顏

宮娃控馬紫茸袍
笑撚金丸彈翠毛
鳳輦北遊今未返
蓬蓬艮嶽內中高

篤梅清香步障遮
并桃冠子玉簪斜
一時風物堪魂斷
機女猶挑韻字紗

萬炬銀花錦繡圍
景龍門外軟紅飛
淒涼但有雲頭月
曾照當時步輦歸

雲芝九幹麥雙歧
盍有嘉生瑞聖時
玉殿稱觴聞好語
時教張補撰宮詞

橋上遊人度鏡光
五花殿裏奏笙簧
日曛未放龍舟泊
中使傳宣趣鄆王

天廐龍媒十萬蹄
春池蹴踏浪花飛
路人爭看蕭衙內
月下親調御馬歸

盤石曾聞受國封
承恩不與倖臣同
時危運作高城砲
猶解捐軀立戰功

梁園歌舞足風流美酒如刀解斷愁憶得少年多樂事
夜深燈火上樊樓

倉黃禁陌夜飛戈南去人稀北去多自古胡沙埋皓齒
不堪重唱蓬蓬歌

河漢如雲掃沈寥登東寒鐵響清宵竹窓驚破高人夢
門外駸駸萬馬朝

輦轂繁華事可傷師師垂老過湖湘縷衣檀板無顏色
一曲當時動帝王

寄尚明學士

短褐沉潛不近名，只今長樂鄭康成。
酒中賢聖無多酌，琴裏宮商一再行。
翰墨放懷新水石，烽烟回首舊蓬瀛。
四愁不為思君作，懷抱何因得暫平。

讀韓子蒼呂居仁近詩

詩人零落嘆才難，二妙風流厭建安。
已見詞鋒推晉楚，定應臭味等芝蘭。
鴻軒意氣慚交呂，鳳躍聲華敢望韓。
咫尺煙塵不相見，他時惆悵隔金鑾。

題將軍巖

昔年棲險人何在
髣髴樓臺杳靄間
事去長空飛鳥沒
時清宴坐一僧閒
霜秋石壁黃金樹
月夜雲濤碧玉灣
杖策時來訪竒絕
漁樵幽興自相關

遊武夷山

回薄湍流漾翠岑
夷猶一舸縱幽尋
幔亭落日笙簫遠
毛竹連雲洞府深
似有碧雞翔木杪
誰將丹鶴寫巖陰
神仙可學非身外
多少遊人浪苦心

致中惠瓜

瓜疇暑雨亂花飛
美質蠲煩喜及時
蘓并筠籠香發越
金刀玉手翠離披
侯家昔見連阡盛
賈肆徒誇厚貌奇
珍重故人多少意
臨風宛若對冰姿

得天台命二首

奉祠得請向天台
清夢先尋紫翠堆
借問劉晨今在否
雲間應見耳孫來

暖風環佩蒲芳洲
貝闕珠宮憶舊遊
此日劉郎心似水

桃花空遶暮溪流

遊密菴三首

半叅樵徑繞危岑
彷彿精廬若可尋
怪底扶筇筋力健
暖風晴日送登臨

病身偏與靜相宜
著意悠悠定自癡
兀坐南窓了無語
篆花縈處一星移

幽興無邊未遽窮
泉聲隨屐下寒空
一秋夢桂仙洲碧
盤礴才能半日中

訪原仲山居

寂寂臨湖屋，湖風為掩門。
鳥聲幽谷樹，山影夕陽村。
好
事長留客，雖貧亦置樽。
平生枯淡意，去此欲誰論。

與致明對榻

勝會嘗連榻，還欣與子同。
一燈寒夜永，殘夢雨聲中。
道
舊驚身老，談元了性空。
卜鄰今有約，泉石興何窮。

登原仲茅亭

茅簷聊徙倚，落日見樵蘇。
過鴈飛何急，寒山遠欲無。
劇

談容漫叟逸興慕潛夫寸祿甘華髮人生底事愚

送瓜與胡原仲

呼兒急走送筠籃敵暑惟應此物堪一握青瑤含秀潤
滿襟寒雪冱清甘搔園底用修鄰怨剪棘聊應益盜慚
他日倘收遺瓣種離離虎掌徧山南

菊

青叢馥郁早抽芽金盞爛斑晚著花秋意祇應宜淡泊
化工可是惜鈿華輕煙細雨重陽節曲檻疎籬五柳家

暮醉朝吟供採摘更憐寒蝶共生涯

黃彥達之衡山有詩畱別因次其韻

窮臘冰霜千里客此行何事更間關
永懷契濶徒酸鼻無力吹噓祇厚顏
鉉槩一囊身計拙烽煙匝地世途艱
曳裾端向龍門去清夢猶應憶故山

懷遠

樓北樓南煙岫遮水光秋色澹無涯
風驚枯葦連汀雨霜着寒楓滿樹花
故人悠悠絕雙鯉別恨耿耿聞悲笳

索居懷抱向誰寫古調一吟青鬢華

梨

尚想飛花照綺疏離離秋實點烟蕪丹腮曉露香猶薄
玉齒寒冰嚼欲無舊有佳名留大谷誰分靈種下仙都
蔗漿不用傳金椀猶得相如病少蘇

築室

旋剪荆榛出舊蹊架巖鑿壁啓幽棲已通鄰圃盡栽竹
更搭飛橋南過溪蓮社昔誇廬阜勝漁舟空向武陵迷

宦遊若勝歸田樂肯把軒裳換一犁

絕句送巨山

二年寄跡閩山寺一笑翻然向浙江
明月不知君已去夜深還照讀書窓

送原仲

惆悵回車不可攀故廬猶得及春還
遙知去路風烟好看盡閩山看越山

致中惠瓜因成二絕句

故人夙有瓜畦約走送筠籃百里間翠甌瓊漿纔一握
極知風味勝黃斑

蔗漿溜溜香浮玉蘇米沉沉色弄金那似甘瓜能破渴
一盤霜雪返清襟

勸六四叔卜居

便合誅茅隱舊陂亂來吾里獨熙熙年豐禾黍侵山土
地僻杉松傍澗歌涉世有求俱爲筭歸田得計莫狐疑
竹林杖屨從茲始二阮風流倘可追

贈王周士

逐客初從瘴海歸平生未識想英奇
致身不負管城子報國聊將雕面兒
古在壯懷猶未已窮途俗眼少相知
虎頭合是封侯相笑挽天河會有時

杖藜

亂後惟憂死無心問歲華
故園依草莽今日見梅花
閩俗嘗三飯僧房但一茶
海瀕猶未穩更擬訪仙槎

有懷十首

滿空寒雨雜飛煙湖上先生擁褐眠借問茅齋容客否
夜燈相伴讀韋編

胡原仲

結茅同隱水雲間何日柴車不往還憶得松林長嘯罷
歸時明月徧秋山

劉溫其

山空墜石咽寒溪雨濕浮雲晚更低不見蕭屯劉處士
年年清夢遶瓜畦

劉致中

當年冊府仰才華一跌青雲萬里賒白首却來蓮社裏

幅巾緇褐誦楞伽

鄭尚明

風驚枯葦白花浮欲下橫橋晚更留惆悵不逢吳季子

一溪寒水帶煙流

吳公路

青錢學士妙文章便合含毫侍帝傍寂寂閩山餘舊隱

憶君時到讀書堂

張巨山

松底柴門盡日關主人西去幾時還長鏡委地黃精老

時有寒猿嘯硯山

傅茂元

馬蹴浮埃去路長相逢端欲問行藏未饒赤壁風流在

且向何家醉碧香

周元仲

翁侯滿腹是精神三謁金門計未成却跨蹇驢遊雲上
秋風雄劍匣中鳴

翁德功

曾訪高人上翠峯至今清興逐松風籃輿夢想行山處

白葛花開細雨中

密菴

山寺見牡丹

倦遊曾向洛陽城幾見芳菲照眼新載酒屢穿卿相圃
傍花時值綺羅人十年客路驚華髮回首中原隔戰塵
今日尋芳意蕭索山房數朶弄殘春

送六四叔之茶陵

底用匆匆便據鞍離觴縱滿不能懽瀟湘萬里客愁遠
鷓鴣一聲春事闌此去宦遊當益顯時來功業自非難
似聞幕府資奇畫好借雄風弄羽翰

蕭屯訪致中

曉色陰晴久未分亂山何處是蕭屯
荒荒日轉漁樵路
靄靄烟生桑柘村
勝地逢春聊駐馬
主人好客為開樽
平生夢想歸田樂
正喜吾儕得踐言

李似表見訪

石磴荆藩隱薜蘿，豈知迢遞枉鳴珂。交游耐久如君少，

邂逅成懽此夕多。千斛敢求身後傳，

時似表兼史

一樽聊和

飲中歌。雲鵬欲舉那留得，南浦傷心又綠波。

致明攜酒來雲際

有客攜家釀，敲門訪病翁。一春寒食過，幽寺晚晴中。嫩
竹扶簷綠，殘花蓋地紅。牢愁賴君破，歸意莫匆匆。

次韻六四叔蘭詩

疎疎綠髮覆清潯漠漠微香起夕陰無復風流追九畹
空餘煙雨暗深林誰分秀色來幽室獨寫遺聲入素琴
還似高人遠塵俗爭輝玉樹亦何心

讀李忠愍文集

英姿直節想堂堂不忍偷生向擾攘二帝蒙塵方幸虜
六臣奉璽更朝梁身輕欲抗豺狼怒名在終同日月光
曾與先君共褒錄拊編交感淚浪浪

同詹明誠傅茂元遊晞真館有詩因次其韻

橘柚垂紅古觀秋歸途邂逅得尋幽晴沙散策隨山遠
夜月回船信水流勝處無詩端可恨他時有酒更來遊
相信二妙平生友老矣襟期共一邱

八白水次韻劉溫其詩

南山北山舊經行諸劉相看如弟兄一枰圍棋果敵國
五字琢句真長城濁醪麤飯有餘樂小几疎簾何太清
我來徑醉未歸得卧對屋角巖泉傾

宿士特山堂懷似表

襪被重來宿山堂故宛然池清秋過月林靜晚生烟
仙李朝雙闕詩翁闕九泉無因訪存沒搔首暮山前

過致思新齋

酷愛鵝溪水潺潺傍馬流落梅寒崦靜啼鳥暮村幽
我病今朝已君家有酒不新齋最竒絕猶得少淹留

約致明入開善不至二首

喬松翠竹鎖禪關乘興時來興盡還懊恨劉郎招不得
瘦筇獨自入寒山

偶臨沙岸立多時
淡淡烟村日向低
幽事挽人歸不得
一枝梅影浸澄溪

宿回向寺

清秋聊命駕
細雨獨行山
淺淡烟雲裏
回還紫翠間
病多新覺老
心懶舊能閒
宿徧山南寺
何曾興盡還

次韻趙清獻陰字詩

石磴雲房隱澗陰
昔年清獻此清吟
鳳池人物終難繼
花縣風流直到今
三尺翠碑遺墨在
一林寒竹暮煙深

平生景仰高名久敢負他時直愛心

次韻溫其種竹詩

種竹應須我輩人茅簷對此可忘貧
歌風帶雨看無厭
淡夜寒梢畫不真青女侵凌餘瘦節
籜龍盤屈更分身
會栽一管招鳴鳳千畝何須羨渭濱

次韻溫其見寄長句

拂衣歸去隱巖扃世事悠悠亦飽經
午夢溪聲搖戶牖
夜吟花影轉廂營已甘衰病安堯壤
豈有聲名動漢廷

好事髯翁羽母見過幅巾藜杖喜逢迎

周元仲將出山有愁別園林後夜春之句因作
此詩以留之

山館春來特地幽
岸巾何日不同遊
花隨石壁高低發
水遶茅簷左右流
叵我三杯真性適
哈臺一枕萬緣休
山中樂事端如許
為底周郎不肯留

伯勝文本袖詩見訪輒成長句奉酬盛意

懶逐交遊戶
晝扃客來曳履亦逢迎
舊知吾里多豪雋

親識君家好弟兄，瓜芋滿畦聊卒歲。
琴書一榻寄平生，驂騑歷塊終千里。
俗眼悠悠未可輕。

呂尚書挽詩二首

昔在賢關日，雄飛接俊髦。
家因登第起，名為諫君高。
荷橐論思舊，牙旗出入勞。
傷心肥水變，遺恨激秋濤。

國步多艱棘，忠誠誓翼扶。
據鞍方矍鑠，罵賊已含糊。
義在光惇史，人亡失壯圖。
因公感家世，憤氣欲吞胡。

和邱斯行牧牛頌

軟草豐苗任滿前，蒼然殼棘卧寒烟。
直饒牧得渾純熟，痛處還應着一鞭。

夜涼

茅舍蕭蕭暑雨餘，夜涼清若在冰壺。
一窓月上杉篁影，便是人間水墨圖。

寄題鄭尚明煮茶軒三首

六言

過耳颼颼未歇裝，懷憤憤俄空他日寧。
逃水厄會須一

訪髯翁

竈鼎從渠染指麪車絕念流涎猶有清饒未已茶甌日
食萬錢

一點春回枯枿萬家譟動寒墟鳳餅龍團玉食傷心半
入穹廬

寄題陳良臣頤軒四首

六言

七事疑生何晏三文夢感虞翻獨養靈龜不昧有人高
卧頤軒

啼鶻底用流血渴水猶貪飲河勿謂山雷象淺人生口

禍常多

奇峯一疊兩疊亂澗清流濁流那識高人勝處閒然心
地能幽

道醇泮宮識面德潤梓里知名相從固應未晚畏君難
弟難兄

胡文定公挽詩三首

今代儒林伯聲名舊藹如不為簪紱累常樂燕閒居悟
主承三接尊王著一書天胡奪遺老素業未全攄

有意扶名教躬行語默中
楷模陶士器藥石補天聰
衡嶽隣新卜伊川道已東
傳經知有子接武大明宮

奕葉論深契平生仰大儒
淹留趨絳帳寂寞奠生芻
忽見摧梁木悲歌碎玉壺
尺書垂獎意提耳愧朱愚

屏山集卷十八

欽定四庫全書

屏山集卷十九

宋 劉子翬 撰

詩

徑山寄生子作道服三首

旋栽山蠶作山衣更著芒鞋白接羅自笑支離風貌野
紆朱紆紫不相宜

遠信慇懃到草庵却慚衰病豈能堪聊將佛日三端布
為造青州一領衫

粲粲休誇綺與紈
紉蘭製芟亦良難
此袍徧滿三千界
要與寒兒共解顏

清泉亭老寄鼓枕二首

團團鼓枕樣新傳
竹簟繩床得飽眠
耳界若聞聲外意
不須搗擊也鏗然

遠遠一覺直千金
雅贈徒知感激深
莫道林間高臥穩
憂時亦有枕戈心

贈總上人兼簡無求居士二首

雙徑山中一衲衣
曳筇遠遠叩巖扉
愧無白壁黃金贈
攜取清風滿袖歸

多謝徽州吳使君
新詩問勞意何勤
無求已得心空樂
更作無心出岫雲

會蔡子思張叔獻二教授

膠庠夙昔記
追隨物變時
移萬事非
曉闕風烟胡騎滿
夜窓燈火故人稀
中郎秉德無瑕類
平子談經有旨歸
獨我衰遲愧朋友
蹉跎已覺壯心違

次韻挹山亭張子猷絕句

鶴駕騰空春復秋
淡烟寒日鎖林邱
夕郎自是金門客
更莫臨風思遠遊

邃老寄龍涎香二首

瘴海驪龍供素沫
蠻村花露挹清滋
微參鼻觀猶疑似
全在爐烟未發時

知有名香出海隅
幽人得得寄吾廬
明窓小爇跣趺坐
更覺胸懷一事無

次韻溫其元日詩

曉來飛雨挾風顛洗出韶容換故年
花動一紅明屋角
山寒亂碧到樽前
病如夜鶴孤還警
老似春蠶飽即眠
賴有故人開寂寞錦囊詩句許時傳

呂丞相挽詩

黃髮三朝老勤勞險阻中
十年流馬策一日斷鼇功
迅掃乾坤靜扶持廟社隆
璜溪今寂寞髣髴見英風

次韻明仲遊北巖

雲巖藏勝絕何路不潛通信步迷時遠冥心樂處同亂
松風索索懸瀑雨濛濛陶謝多清興招邀有遠公

李丞相挽詩三首

委質艱難際精忠日月昭引裾堯浸縮斷鞅虜氛消顧
盼安諸夏風聲動一朝南遷誰辨謗公論付芻蕘

文武中興相名高北斗南茂弘恢遠量安石暢元談六
策陳丹扆三休寄夢庵

公所居
有夢庵

人亡今孰賴憂國意如

悵

宿榻勤初設詩筒辱屢傳一嗟雲霧隔坐閱歲時遷埋
玉俄成恨乘風想已仙終當挽行紼長慟總帷前

無諸策題問顏亡絕好軻沒無傳

孔林黃玉化飛埃一派淵源有自來具體好時心似谷
厲辭傳處口如雷聞聲盡是緇帷容見色無非古市槐
却訝文公迷聖戶不知靈鑰有人開

次韻黃宰一源亭二首

聞說催耕步澗幽田家喜氣共春浮仁聲似水潛漸物

不作驚人洶洶流

宿榻浮塵拂不開胸中豐恨結崔嵬幔亭雲散天全露
猶想雙鳧化鳥來

翁仁山受恩歸以詩相訪因次其韻

寒階響葉終日靜剝啄欣聞人叩關一聽清言風灑座
幾回幽夢月沉山遺珠未許留滄海老驪終聞在六閑
獻策明光豈無用人心久矣厭多艱

題王巖起樂齋三首

數叢脩竹擁齋居興味翛然樂有餘
午枕睡酣窓寂寂
清風來去自翻書

怪底愁端生不已勞心逐事事無窮
陶然一點冲融趣
只在清虛淡泊中

我亦雲根結小房年來與世界相忘
定知可蛻紛華事
不及絃歌氣味長

寄巨山

分攜六換禁城煙夢也慵飛到日邊
綵筆尚懷貂可續

冰街時許鴈遙傳
紫薇院靜君宵直
綠苧村深我晝眠
會向急流歸亦好
雙筇同訪幔亭仙

寄題觀瀾亭二首

遙知壓水創新齋
百里寒聲席下來
准擬杖藜秋夜去
同看月湧瀾銀堆

未合滄溟勢不休
噴雲蓄石幾經秋
雄心戲欲相吞吐
一縱詞瀾筆下流

遊密庵致明有喜雨詩次原韻

雨氣經巖上，僧窓暗復明。
溪流生急響，松吹助狂傾。
襴無邊潤蘧蔭，一味清仁心。
樂同飽擁鼻，發吟聲。

次韻熊叔雅七言

只今漂蕩賈長沙，來往三山躡緯霞。
馬上新詩猶憶友，枕邊幽夢不離家。
風驚枯葦連汀雨，霜着寒楓滿樹花。
却記梁園初識面，干戈豈料落天涯。

題石井二首

玲瓏巖穴巧如剗，中貯滄浪百斛餘。
衰懶自憐遊世久，

襟懷未及汝常虛

道經蘭若偶停鞭
客裏逢幽意惘然
一把綠蘿家石竇
夢魂翻憤醒心泉

登鷺湖妙峯亭次韻

偶向妙峯亭上望
一襟寒色近春分
晴風吹散天全露
吹盡江南江北雲

題吳若愚一經堂

老矣惟書愛未消
喜聞新塾出塵囂
軒窓近水來無厭

絃誦因風聽忽遙遊藝定知輕拾芥正心端欲似耘苗
一經教子誠為樂家世從今未寂寥

寄如愚珙二首

別殿遙聞駐六飛天顏咫尺引儒衣吾家亦有臚傳喜
叔姪聯名賜第歸

鴈塔蟾宮畫假途要須行實副名譽六經堂上歸來日
飽讀平生未見書

次韻朱喬年送山老住三峯二首

已愛雲山信脚行
檢人詩句更增情
直須吏部尋盟日
急遣雙魚一寄聲

平生耳裏三峯寺
况識峯頭新主人
借我一筇扶病去
月林松吹度綸巾

朱喬年同傅茂元見訪

校書蘭臺昔名士
懷望會稽今望郎
忽驚風采照戶牖
便覺肺腑流冰霜
手談逼剝屢爭局
眼視台臺時對床
山林情話政可樂
只恐雲路雙雕翔

寄題黃應亨東明齋二首

青藜不復來人世好學如君自少雙
賴有羲和鞭日轂
曉紅常照讀書窓

齋居雅意與誰論會見依光沐寵恩
慚愧野人欺我懶
相招炙背坐松根

寄題清軒二首

聞說名軒寄遠情得非遊世厭營營
丈夫出處渾無累
只要心源一點清

中郎言語妙天下曾向軒中記舊遊一尺翠珉揮染罷
冰輪夜轉屋山頭

有感三首

八葉炎圖茂千齡聖主昌農桑開漢域禮樂煥周庠宴
祭三登樂謳吟七閩長徽名辭鏤玉盛舉冠前王

運屬宣和未干戈變故仍倦勤脩內禪流澤啓中興睢
水千麾集胡沙八駿騰尺書傳諱日寰宇淚如澗

孝感柔強敵和盟定一朝龍輶來瀚海鶴駕返神霄歌

吹仍祠禹羹墻若見堯稽山同峻極從此百神朝

和黃德欽韻贈公路二孫

佩鞞趨蹌正妙年階庭蘭玉固天然人間百藝皆由學
惟有讀書知子賢

謝致中瓜二首

萬言不直一杯水才似謫仙良可嗟顧我小詩偏發市
年年博得蕭屯瓜

病翁癡絕端可笑文墨飢餓誰得稱故人分甘聊爾耳

更向詩流說我能

唐君則賦光壁堂詩拉余同作

幽行已辦百枝扶况有溪山近故廬水碧山花都幾許
道人着眼恰無餘

李佐國攜致中贈別詩來戲成二首

星郎絕筆版曹卧懶翁病翁稀綴文豈料詩壇今再鼓
蕭屯賴有故將軍

贊皇吟毫不可掣交游酬答被惱深贈言排狠入吾里

以鄰為壑君何心

次韻白雪梅二詩

閩雪少曾棲瓦白怪來浩浩擁寒濱戒嚴故作敝裘厄
淡彩潛催幽幌晨眼觀醉中迷有色心華淨處照無垠
搖松旋拾晶熒煮已覺肥生齒頰津

豪氣無根老自推尚留餘習愛尋梅苦寒扶病也須去
薄暮微吟垂欲開靜納長芬風外塢醉臨高白水邊臺
無言自得幽貞意莫吐肝腸錦繡才

原仲致中寄雪梅二詩再次前韻

一雪度臘寒不春風光淡然溪谷濱清湖讀易月當午
烏石掛廬梅照晨未借流膏耕沃野聊乘爽氣歎蒼垠
嗣音風雅愧辭竭安得筆翻雲漢津

飯了意行忘遠近脩脩老眼入疎梅愁邊賞味平生劇
亂後橫斜幾度開勝韻撩詩頻占囁冷香熏夢破吟臺
莫將花客輕題品自有渠儂十倍才

橙子四首

尚懷細雨初移日著子已見清霜潛絕憐面有貴人色
偶致吾儕樽俎間

橙蘂細縷風韻勝我不痛飲那知音何如金丸走衾枕
三月夢遊蒼苔葛林

自從天籟守吏散老樹零落煙雲淒今朝我為作知己
小摘秋風黃欲齋

花瓷泛密小劑供極有痛快麤邪功生枝滋味雖可口
流品故應甘下風

寄巨山

故人浮家攜李傍為愛脩竹分僧房
霏霏玉塵夢千里
剡剡銀鈎書數行
極知神潛鼻端白
祇恐喜動眉間黃
烟波莫久費吟筆
好繪日月增天光

次韻傅茂元二絕

濠樂亭前花已披
馬軍送酒故來遲
只恐春雨卷春去
紅染芳郊一徑泥

酒興何如畢吏部
詩情已過鮑參軍
醉吟自足了一世

肯羨飄飄出岫雲

居仁報李季言論養生之益

平生外驚已知非木枕藤衾老可依
春半風光唯掩戶
病邊懷抱自忘機
不知靜守綿綿息
何似閒隨栩栩飛
欲寄勤渠問仙李
元闕底處是真歸

次居仁韻

是身如樹槁窮冬
一點心花自閉封
久矣吹噓存泛愛
偶於遲暮得相從
頗聞妙用縱橫是
深愧真源左右逢

白雪黃芽計雖下可能無意起龍鍾

送致明之高沙三首

忽驚風袂去翻翻老子吟
毫強更援底事幽懷却成惡
鷺峯一點入離樽

不夢清淮鬢欲凋因君行色意飄飄
鐵頭船子舊遊處
三尺霜鱗鏡面跳

棠棣陰中更唱和嘉賓助勇氣如雲
勢孤屢欲拱降手
恐辱高沙小使君

次韻新鄉諸公雪詩二首

臘裏天宮未得閒，重陰先殿晚來寒。
數絲綽約流空際，一陣繽紛糝夜闌。
已傍餘光窺蠹簡，更消清液試龍團。
杜門自覺心神瑩，老去追隨只強歡。

貪行璀璨意無寒，不管飛花著鬢斑。
一段清光貽老境，十年勝覽在家山。
遙知物外徜徉樂，肯放毫端造化閒。
寸鐵不攜當百戰，欲申前令愧辭艱。

大年三月書來許訪敝廬，繼聞阻雨已歸近聞。

復有來意以詩溫之

畫沙筆妙言猶在折角巾歌興已窮不見此豪春色晚
至今遺恨雨聲中詞華端是補天手詭浪故存高世風
聞欲尋盟石峯下人生能費幾枝筇

分茶公美子應預為白曬之約

夢裡壺山尋二妙不因荔子鬢絲華聊分茗盃應年例
故有筠籠來海涯鮮苞尚想妃子笑槁面何取西施羝
老饒惟作耐久計一瞬紅紫真空花

奇仲德華第二轉語皆有旨趣致中乃謂僕操
兩可於其間戲成長句

不可無詩絕蓋簪雜然嘲玩寄嘉音唯阿似是摸稜手
虛靜初無照物心蓮蕩遠陰波面合堇峯橫翠雨中深
頗能逐勝此來否一笑又成梁甫吟

寄致中因温前約

故山歸路豈云賒憶對春風餞物華尚口乃窮憐反舌
以年當廢惜殘花勤渠載酒傳非誤倉卒回輿事偶差

今日重來綠槐夏已拌纈面醉君家

原仲紅釀甚佳嘗有十壺之約小詩發一笑

廣文挾書門戶閉廣文置書樽曩開但欣引入著勝地
豈暇問客從何來走浪畦風初綠稻屑塵村雨欲黃梅
十泓琥珀今餘幾壘塊非澆不可摧

居仁與季言論養生方往叩之而原仲詩有金
花充腴之語乃知致中妙用如此近舍皇甫
遠取居易豈不迂耶以詩請事

紫微談道渺無津
逸步超然嘆絕塵
但向函關迎老子
不知鄭圃有真人
數絲雪髮神彌瑩
一點金花意自春
莫謂子衰難語此
胸中勇氣尚輪囷

致中詩戲論詩棋酒輒次原韻

只應心醉六經醇
自是陶陶晉魏人
每向幽居橫素榻
惟容我輩岸烏巾
毫端空有千題巧
枰上原無一着真
要得坦然懷抱穩
煩君澆潑乳泓春

屏山集卷十九

欽定四庫全書

屏山集卷二十

宋 劉子翬 撰

詩

致中招原仲遊武夷

病暑冠裳與體忘一廬幽僻得深藏
微風時度澗光活殘日忽無山氣涼
但想子綦方隱几終慚南郭謾連墻
何時九曲尋幽事船尾應須著漫郎

致中手談見知胡漳州而奇仲未有定論

了無勝負着胸中三百枯棋破老慵
雲陣春收花脫樹
電聲夜碎月啣峯
危機每憚張頤虎
窘步休誇獨眼龍
無復漳州賞新妙
只應公論付吾宗

次韻茂元茉莉花詩二首

翠葉光如沃冰葩淡不妝
一番秋早秀徹日坐傍
香色照祇園靜清回瘴海涼
倘堪紉作佩老子欲浮湘

三尺婆娑樹千英
一律收眼孤猶眩
彩鼻熟不知香向
月資清潤承風發
素涼衆芳如不忌
移植近瀟湘

同才仲入山有懷奇仲

客至那容懶牽羣入翠蘿山光知雨過野色見秋多妙
語時相奪微吟只自哦吹埵來獨晚此日恨如何

寄行夫兼懷如愚珙

已把重陽菊吟懷不為秋江湖三俊遠天地一翁愁日
近書來少宵長夢不休吳雲猶可望時上董峯頭

致中相拉遊武夷有六耳不同謀之語原仲和
章意似未平也再次原韻

年衰漸涸玉池津擬乞明窓一七塵底用趨風防六耳
須知對影已三人高情政喜追靈運飽學那容欠大春
右挈左提俱有賴應憐懷抱久傾困

呂居仁挽詞三首

粹美元功畀風流相國傳有光文聖道無物累心淵侃
侃當春氣堂堂忽逝川東萊一點秀冥漠楚山邊

皓首猶貪學謙虛德益豐潛神無朕際悟物不言中雖
處持荷貴常安粹姑寤笑談驚委蛻儒事有英雄

江左欣初見傾輸便豁然挽留嘗一粥契闊已三年老
去無新得書來每自鞭幽明雖永絕凜若在君前

奇仲和致中棋詩有玄中一着是吾宗之句

局上深機未足窮玄中一着若為通五宗惟明不是物
三語孰解將無同常恨老懷多情憤每逢益友太匆匆
金篦刮眼寧無賴况是墻西有德公

奇仲和詩有吸盡西江說是公之句

南鄰袖手只如愚東里談玄亦甚都可是據鞍方矍鑠

須防鸞璞得盧胡春空潮響來何自秋浦天容落欲無
萬古西江只如許何煩呼吸費功夫

吳公路作功德院記成同居安入山書丹

淨坊疏寵自吾君蓋有豐碑載策勳方見隳崖龍裏琰
忽驚落筆散彤雲言言未索西山氣靈靈新搗左氏文
從此拱辰非厚夜月明鐘鼓九霄聞

子靜閱僕舊舉子文有詩因次原韻

雪縠烏紗氣似雲搖毫不瞬已成文兒時追逐無三捷

老去荒唐更十分木裏液樛將底用韶邊朋肯豈堪聞
却慚鋟板能流惡一付焚如政賴君

寄秀峯忠老

高鐘號月掩巖扉遙想幽人不夢時曾聽微言知見妙
應憐懶我用功遲情疎種種寧相貸窓靜山山尚可疑
倘有一單容過客眼中須接秀峰奇

轉秩奉祠蒙朝佐子靜慶以四六戲裁長句

一嶺無情阻面談鳴翰忽隨得雙函抽黃對白雖云妙

刻朽噓枯祗益慚小轉只緣官帶右雄飛無復夢圖南
借留賴有天台侶老矣真成七不堪

致明贈茯苓如嬰孩狀以詩為報

老松寒不死密壤聚流脂小劇凌蒼翠深藏發怪竒應
憐霜鬢客為寄玉嬰兒屑餌消殘疾同尋汗漫期

次翁來借諸家易解聞已有新說以詩借觀
天庭吐氣作青紅驚邏猶煩小試中政使著鞭無暇日
惟應讀易有清風畫評一卦紛然異夜夢三爻廓爾通

聞說新箋極玄妙可無殘賸到衰翁

寄子靜

有約來何晚行吟遡遠風老懷清似水雙鬢亂如蓬
晤語非無得疎慵政畧同秋來湖上集只是欠單公

夢如愚珙

驚破池塘夢宵長不再眠寒聲搖谷口側月到床邊
一自芝蘭遠都無翰墨傳老懷安得寫孤韻不成篇

食鵝梨三首

寒烽夜滅楚淮長
客舸輕搖度碧光
北果初來珍重意
層層般紙透清香

拂拂鵝黃初借色
涓涓蜜醴為輸津
冷然一滌心淵淨
熱惱無因着莫人

瑠盤一卵寧論價
新帶中原雨露來
却憶春行梁宋野
雪花瓊藥數程開

次李吳伯韻

蠟封泥印了不勤
索居十載常念羣
戀鄉寧飲建溪水

懷友忽夢龜山雲閣中意度不沾俗老去詞華全付君
阿戎來歸得新語戲筆報謝非夸文

送暉侍者之湖南

茗椀深澆破別愁摻裾猶得小遲留不將流落遇知己
故向艱難作遠遊春動閩山迎兩屐夜涼楚月趁孤舟
相逢應說龐公笑黑頰黃髯萬念休

次六四叔青字韻

寫出吳中勝平生歷歷經露窺烟渚靜山入柁樓青老

氣何由逸奔暉不肯停北潭搖夢否淥面照軒櫺

題慎儀餘清閣

并溪取次得竒觀更舞新霓翠木端政喜閒身時可到
忽驚醉眼晚來寬故添山色浮嵐潤不逐湍流獨月寒
散帙南窓更清絕興來只欲跨飛翰

春興

弱淥才勝舫危青更著樓管絃非老伴風雨定花讐兀
坐還無味微行却自由只嫌詩作崇咕咕不能休

時中良弼茂元慎儀集水閣

水色兼山影漂搖小閣西風來幽囀活雨過萬紅低烟
烟杯中趣喧喧枕裏迷新年一聲笑四友在潭溪

致中晚集

笑語北潭晚微寒入綺疏雨聲留篆霧燈影躍潛魚病
間欲踈酒老便惟讀書喜君新隱地山翠切吾廬

醑醑四首

蒙籠春幙頂天矯赤虬身雨蕊猶絨暖精神照晚春

斑斑心點紫疊疊萼承冰除却橫枝韻羣芳盡與能
獨立幽亭晚春風玉一圍殘英不着地去作嶺雲飛
霜旋薰碧醪氣味已相傳終以香為累無人解倒懸

寄張子平

老矣張平子飄零客此州清樽如有伴白髮不知愁雨
燕捎簾入風花擁檻浮夢中家在否歸興苒苒悠悠

次明仲涼字韻

浮暑熏人只欲狂秋聲未肯抹橫塘倦看黃妳渾無味

醉着白練如許涼掃砌政須修竹舞蔭花絕愛巨荷張
紫髯不是輕風景更擬回鞭向葛強

晚飲

招提聊駐屐却去白雲堆老眼看山倦餘懷向酒開晚
涼微雨送秋意一蟬催醉裏揮犀妙方知有逸才

次韻長汀壁間韻

竄鼠驚殘夢蕭蕭老屋虛風聲傳遠瀨寒意入秋蔬客
路漂搖久歸身憔悴餘西窓滿殘照髣髴似吾廬

問明仲遊武夷日

兀兀聽涼雨開門水漲川
獨行楓葉底秋興鴈行邊
老去無多事閒知有勝緣
何時縱仙舸我亦願周旋

次韻文殊五言

小雨貽新句端知印印泥
凝眸方過鳥倚杖忽橫溪
老態猶堪強真豪已覺低
鐘聲隔林寺慚愧有幽棲

次韻梳坑七言

酒香渾若過新豐心事悠悠
冷笑中徹夜道傍梳葉雨

幾年馬上桂枝風，高情未許愁能挽。歸意唯應夢可通。
准擬今秋剩，追逐暗泉鏘。佩月潭東。

次韻明仲幽居春來十首

醉毫巨我落烏絲，况是桃源乍入時。祇恐昇平要華藻，
賜牋春動萬年枝。

幽居十絕巧凌春，我亦剗腸強效顰。憂樂懸知不同調，
山南山北寂寥人。

一幅烏巾雪髮盈，村深時聽鷓鴣刀聲浪。將蘭艾評春事。

我自平生小屈平

歸來十六見新元種得黃楠遠舊村豈是倏然便遺物
吾衰不復夢修門

蒲團宴坐若還家羅穀如空了不遮可是春風搖得我
蘭芳輕嗅淡黃芽

莫遣瀟湘雙鯉來歸心正怕曉禽催咄嗟新轉渠渠屋
寒士懽顏正爾開

噦噦鳴山筇一枝逢春聊復詠歌之故園風光本具足

浪藥浮花莫作迷

蓬鬆衰髮倦重簪一榻惟便獨寢甘却憶少陵詩句好
依然雲木曉相參

近鄰分得續隨栽准擬新晴手自培不奈餘寒侵病骨
耬耩無味却歸來

豈慚辛苦把漁竿猶有機心傍釣灘文定書堂最深穩
何如袖手試觀瀾

次韻六四叔村居即事十二絕

桃花偏傍謫仙居，點綴高岩今幾株。
力士鐺邊欠何物，著鞭跨馬是狂圖。

飯了呼童疊石門，雨餘幽事不勝繁。
花殘不用深惆悵，梧竹新陰又滿園。

偶隨流水到僧家，身世渾如焦穀芽。
午夢不知緣底破，篆烟燒徧一盤花。

聞道清湖別有春，花邊玉笋想長身。
怪來幾日詩筒少，盡寫瑰竒賦洛神。

潭邊春水碧於苔為聽泠泠溪畔來不耐顛風阻人興
漁舟欲上又吹開

蠲病唯應一日晴小窓螢度暗還明韋編讀罷聞幽鳥
演出精微是此聲

酒惡時來漱淺谿玉池汨汨自生肥遊鯈豈解吾曹意
聊復蓬頭坐釣磯

春來大半在農疇邂逅相逢皆飲流貪看暮烟馳萬柳
不知明月上前洲

庾郎食事惟三九適口方知味味珍擬欲招邀無此客
虎頭不是箇中人

遠鶴歸來本姓丁啞啞幾見弄文棚人間過眼事如許
何用封侯羨頡羹

屋角仙洲入眼明清風澡滌醉魂醒麻姑未必堪搔背
薄相由來是蔡經

幾許椎埋盡把鋤而今戶戶偃犀渠太平無象從何見
一夜春風長碧蔬

凝雲堂詩次文賀州韻

君家遙借我家山我亦時來一笑看縹緲雲扶千疊秀
空濛翠滴兩川寒已將老目供秋晚未覺豪情怯酒闌
文伯詩無飄泊歎盡將幽抱付遐觀

次明仲勤字韻

苦無聊賴憶披雲曳杖寧知四體勤握手便成忘適適
縱談終愧自聞聞浮蛆釀熟貽彭澤斫鱸圖成想右軍
莫為冷風發歸興石峯秋月許平分

次韻明仲贈六四叔之作

平生一笑輕離別，林下相從各壯年。
絕愛步兵胸壘塊，更欣阿大語蟬連。
杖藜只作尋常出，卮酒何辭一再傳。
燕頷虎頭經賞識，定應接武向甘泉。

次六四叔韻

筍輿沾汗每蒼黃，今日追隨得快涼。
水落不知沙徑改，風微如斲橘林香。
我緣新病仍添懶，君不時來有底忙。
只恐家山誚人去，十年秋興在殊方。

祝道人日供梅蘭偶成小詩二首

病眼亡聊祇強回道
人得得供新梅
谷寒未必春先到
幾夜冰蟾照得開

野客分花入戶間
此心今合付翛然
平生費盡金鷄嘴
不負幽芳十七年

梅詩呈六四叔

一枝新白破長林
定想霜毫落有神
蹶蹶若予將底用
猶堪卧護北潭春

寄致明并紀惠鴈觀梅之舊

稚劉於我最多情此日詩筒不絕聲孤鴈相依真得地
早梅一粲又傾城向來蘭好知誰許病後霜林懶獨行
小几清香慰臨別極知了了萬緣輕

拙句謝伯達老友

贈梅發言吾過矣衛生無術誰之尤魯兀游心聊自遣
樂春舉足豈無憂

次韻上梅嶺

鞭鞭紅入白剪菜玉登盤是處喜相挽我來如許難沙
清才灑灑陟翠入礧礧勃窣乾坤裏伊誰不自安

詞

驀山溪

寄寶學

浮烟冷雨今日還重九秋去又秋來但黃花年年如舊
平臺戲馬無處問英雄茅舍底竹籬東佇立時搔首
客來何有草草三杯酒一醉萬緣空莫貪伊金印如斗
病翁老矣誰共賦歸來芟龍麥網溪魚未落他人後

滿庭芳

和仲明木犀花

秋入微陰涼生平遠小山愁絕天南似聞還斷飛策徧
千巖葉底輕黃纂纂惱人是微裂芳緘條然勝清真冷
淡無艷寄塵凡澄潭欹兩岸波光搖動碧影相參任
西風十里吹度松杉我自寒灰槁木怡神處不覺醺酣
歸來晚飛花無跡明月滿空函

南歌子

和章潮州二首

卜夜容三獻徵懽極一時風流太守未龐眉放出筆頭

光焰壓金閨
藻麗花駢葉
清高雪亞枝
曼聲恰與貫
珠宜聽此
直教拚得醉
翻卮

伎倆無多子
逍遙自許時
閒愁且莫著
雙眉恰有梅香
一點到幽閨
寵辱棋翻局
光陰鳥度枝
頽然一醉是
便宜擬倩潭風
吹綠漲瑤卮

屏山集卷二十

屏山集原跋

屏山先生文集二十卷先生嗣子珙所編次已定可繕
寫先生啓手足時珙年甚幼以故平生遺文多所散逸
後十餘年始復訪求以補家書之闕則皆傳寫失真同
異參錯而不可讀矣於是反復讎訂又十餘年然後此
二十卷者始克成書無大謬誤喜以門牆洒掃之舊幸獲
與討論焉竊以為先生文辭之偉固足以驚一世之耳
自然其精微之學靜退之風形於文墨有足以發蒙蔽

而銷鄙吝之萌者尤覽者所宜盡心也因書其後以告
後之君子云乾道癸巳七月庚戌門人朱熹謹書

跋家藏劉病翁遺帖

病翁先生壯歲棄官端居味道一室蕭然無異禪衲視世之聲色權利人所競逐者漠然若亡見也喜蚤以童子獲侍左右先生始亦但以舉子見期而喜竊窺觀見其自為與所以教人者若不相似暇日僭有請焉先生欣然嘉其有志始為開示為學門戶朝夕誨誘疊疊不倦其後先生屬疾喜適行役在外亟歸省問先生喜甚顧而語曰病中無可與語幸吾子之來歸也自是日奉

湯藥先生所以教詔益詳期許益重至為俱道平生問學次第傾倒亡餘一日從容因出詩一篇見授先生性不喜書常時詩文率多口占使諸生執筆獨此與贈劉致明文長句皆手書之其意可見也既又發故篋得碎紙數十皆平日省躬自勵之言稍以先後次為一篇命喜與同舍生黃銖筆之復取閱視手自更定數十字間不一日遂啓手足諸子姪乃共發其先所緘封遺書數副皆喜未歸時所留處畫庶事遍及遺孤復有片紙屬

熹為作張公書未有勉力大業之語熹始得拱受而寶藏之以至於今不敢失墜然而躬行不力老大無成不能以仰副當日付授之意抱此衷愧恨每念將無以見先生於地下今病已力何所復云始取遺墨聯為一編而序其本末以示子孫且以示諸同志使於前修景行之懿知所跂慕而又視熹之慵惰亡聞以為前車之戒也熹字元晦亦先生所命其祝詞具在以非臨終手筆別附他卷先生沒以紹興十七年丁卯後五十二年

慶元己未五月丙申門人朱喜書

